

李文恭公遺集

李文恭公奏議卷二十目錄

湘陰李星沅石梧著

男

棨 概 梲

編次

江督

恭謝

頒賞福字摺子

奏報丁未綱淮北鹽課照數全清摺子

附奏淮北餘銀片子

揀員升署崇明縣知縣摺子

另委監司大員抽查賑務摺子

標營坐落災歉地方借支米折餉銀摺子

在籍尙書捐賑議敘呈請代奏謝

恩摺子

附奏因病請

假半月片子

附奏上年捐資助賑各員片子

揀員請調川沙同知摺子

南鹽因災紉運酌籌辦理情形摺子

特參官運委員顏晉敏等摺子

附奏請升九江水師營守備片子

營員查稟互異請撤任審辦摺子

奏請展假半月調理摺子

籌修江甯水關閘座涵洞摺子

縷陳南漕分成改折易滋流弊摺子

特參六安州知州文廷杰摺子

附奏運鉛人員請借銀兩片子

附奏調署江都縣知縣片子

揀員升署京口左營游擊摺子

遵

旨興辦沛縣寨子堰摺子

九江水師營守備衙署移建府城西門摺子

臚陳疽患難以速痊懇

恩開缺回籍調理摺子

請將疎防洋盜之總兵交部議處摺子

輪閩江防礮隄並捐辦礮位完竣摺子

附奏請獎出力水勇片子

附奏辦理戰船片子

請修兵房營房等工估需銀款摺子

揀員請補桃源縣知縣摺子

揀員請升蘇松鎮標中營守備摺子

附奏運鉛人員請借銀兩片子

恭報交卸兩江總督篆務叩謝

天恩摺子

奏請叩謁

大行皇帝梓宮摺子

自京回籍恭謝

天恩摺子

恭謝

頒賞福字摺子

奏爲恭謝

天恩事竊

臣

標齋摺弁回奉到

恩賞福字一方當卽恭設香案望

闕叩頭祇領洪惟我

皇上乾符介景

泰宇迎韶

李文恭公奏議

卷二十一

江督



普茂育於三正元調鳳瑄

萃嘉祥於百順墨澁龍文

建皇極而

敷錫凝釐

握斗杓而

均視賁寵

恩隆雨露采煥星雲

臣

職守申圻佇鱗編之快雪歲占

酉熟仰

鴻羨之宜春欽承

義畫以冀軒歡盈江甸願切

虞廷之颺拜頌徧海隅所有微臣感幸下忱理合繕摺

恭謝

天恩伏乞

皇上聖鑒謹

奏  
道光二十九年正月初八日具

奏奉

殊批知道了欽此

奏報丁未綱淮北鹽課照數全清摺子

奏爲恭報丁未綱淮北鹽課照額全清仰祈

聖鑒事竊照淮北引鹽經前督臣陶澍於辛卯綱將湖  
運滯食各岸減輕科則改行票鹽

奏准俟至年底核算造報奏銷嗣因票鹽試行有效  
又經

奏明將湖運暢岸一律推廣辦理如有多運卽以融  
代江運之不足並將科則復還舊制每引徵銀一

兩五分一釐在案茲丁未綱淮北鹽課錢糧於道光二十八年屆應造報

奏銷之期據鹽運使但明倫分別截數造具冊揭詳

送前來臣查丁未綱應徵入奏不入奏正雜各課

銀三十一萬一千二百五兩七錢二分七釐

內票販請運引內徵完銀二十四萬五千二百四

十八兩九錢八分一釐商運引內徵完銀六萬五

千八百七十六兩七錢四分六釐以上丁未綱正

引額課業已徵足又丁未應帶徵道光八年丙丁  
銃引案內銃銷乙酉殘引節年引課銀一萬六千  
三百二十四兩內於票販引內撥收銀三千七百  
四十七兩六錢商運引內徵收銀一萬二千五百  
七十六兩四錢以上丁未綱帶徵課款亦已徵足  
二共徵完正帶課銀三十二萬七千四百四十九  
兩七錢二分七釐此淮北民販商運徵課各額之  
實數也至運鹽引額查淮北丁未綱綱食各岸額

引共二十九萬六千九百八十二引內票販止該  
請運正鹽二十一萬五千三百六十二引今自二  
十七年造報

奏銷後起至二十八年年底止其請過四十六萬二  
千四百八十三引內除應行造報正額鹽二十一  
萬五千三百六十二引竝以濫請之鹽撥補江運  
不足鹽一萬八千七百三十八引仍有濫請鹽二  
十二萬八千三百八十三引計濫稅銀二十四萬

三十兩五錢三分三釐應遵道光十八年

奏案同二十八年餘存經費並另增雜課一併歸入  
協貼淮南案內辦理又商岸丁未應請正鹽八萬  
一千六百二十引今止運過鹽六萬二千八百八  
十二引計不敷額鹽一萬八千七百三十八引仍  
藉票鹽撥補足數是票鹽行銷暢旺課額充盈堪  
以仰慰

宸廑所有丁未綱淮北鹽課奏銷合額緣由理合恭摺



具

奏伏乞

皇上聖鑒謹

奏 道光二十九年正月初八日具

奏奉

硃批戶部知道欽此

附奏淮北餘銀片子

再准北濫請票稅及雜課經費等項每年共可得銀三十餘萬兩於道光十八年

奏明箇爲協貼淮南雜款又二十二年二月於淮南減運帶課竝淮北加完南課案內

奏准該年開辦淮北票鹽仿照成案派令票販代納淮南懸引二十萬引入

奏正雜課銀三十一萬八千八百九十八兩九錢八

分九釐同協貼之三十六萬共銀六十七萬八千  
八百九十八兩九錢八分九釐統歸淮南造報入  
奏正帶正雜課銀在案茲據兩淮鹽運使但明倫詳  
明丁未未綱溢請票稅二十四萬三十兩五錢三分  
三釐又加增雜課其銀九萬二千四百九十六兩  
六錢又票販所完經費及上綱餘存銀兩除撥商  
課及應支各款外盈餘經費銀十六萬三千三百  
八十五兩二錢二分零三共合銀四十九萬五千

九百十二兩三錢五分三釐零照案協貼淮南戊  
申綱銀三十六萬兩同票販應完代納懸課二十  
萬引銀三十一萬八千八百九十八兩九錢八分  
九釐二其銀六十七萬八千八百九十八兩九錢  
八分九釐除統歸淮南造報入

奏外計仍餘銀十三萬五千九百十二兩三錢五分  
三釐零歸入下綱計數等情

臣

覆核無異謹附片

陳明伏乞

聖鑒謹

奏奉

硃批戶部知道欽此

揀員升署崇明縣知縣摺子

奏爲海疆要缺知縣揀員升署以裨地方仰祈

聖鑒事竊照崇明縣知縣熊傳粟升補蘇州府總捕同知奉准部覆應以道光二十八年八月二十六日

作爲開缺所遺崇明縣係繁難海疆要缺例應在外揀選調補該縣四面環海政務殷繁且逼近奈山洋面盜匪易於出沒緝捕尤關緊要必得精明強幹之員方足以資治理臣等於通省現任及候

補知縣內逐加遴選人地均未相宜一時實無合  
例堪調堪補之員惟查有嘉定縣縣丞孫豐年五  
十一歲順天大興縣人祖籍山西由監生捐納從  
九品分發江蘇委辦票鹽出力保舉儘先補用又  
拏獲洪澤湖強搶米鹽案犯保舉補缺後以應升  
之缺升用咨署句容縣龍潭司巡檢遞升嘉定縣  
縣丞道光十八年十二月先行任事十九年二月  
奉文准升二十一年浙江軍務委赴海口事竣保

奏奉

旨賞戴藍翎二十四年十二月初次六年俸滿保薦奉  
准升用曾委署金山縣事於地方緝匪催科頗資  
整頓覆查該員樸勤勇敢熟悉情形現署崇明縣  
事計已一載辦理均屬裕如以之升署斯缺洵堪  
勝任據江蘇藩臬兩司會詳前來臣等往返札商  
意見相同合無仰懇

天恩俯准以嘉定縣縣丞孫豐升署崇明縣知縣實於



海疆要缺有裨如蒙

俞允俟部覆至日照例給咨送部引

見恭候

欽定如果始終勤奮再以稱職

題請實授倘稍懈弛卽行撤回該員係保薦應升之  
員請升要缺一切因公處分例免核計其由巡檢  
遞升縣丞竝非州縣以上今請升署崇明縣知縣  
係屬初升前任內應宗罰俸銀兩飭令完繳另行

造冊咨銷所遺嘉定縣縣丞係佐雜要缺容俟奉  
部知照截缺再行遴員請補謹合詞恭摺具

奏伏乞

皇上聖鑒訓示謹

奏 道光二十九年正月初八日具

奏奉

硃批另有旨欽此內閣奉

上諭李星沅陸建瀛奏揀員升署海疆要缺知縣一摺

著照所請江蘇崇明縣知縣員缺准其以孫豐升署  
照例送部引見該部知道欽此

另委監司大員抽查賑務摺子

奏爲遵

旨另委監司大員抽查賑務及河南運到米麥撥放春  
賞口糧緣由恭摺奏祈

聖鑒事竊照鹽城縣查賑委員張震等前因辦理未能  
周妥任聽鄉地人等索費捐票經<sub>臣</sub>等會片

奏參欽奉

上諭張震紀煥遼湯致中均著革職從重懲辦並著另

委監司大員督率抽查力祛積弊原派之候補道陽  
金城著不准其派委等因欽此

臣等凜遵

諭旨復行嚴飭司道將該參員及應訊人等迅速提集  
澈底究辦一面將原委候補道陽金城撤令回省  
銷差另委抽查揚屬賑務就竣之候補道汪根恕  
馳赴鹽城暨山陽阜甯桃源等縣認真督率抽查  
其江甯府屬賑務因無在省候補道員先委候補  
知府陳延恩等分投查辦旋復札委署江甯藩司

積喇明阿就近親詣各屬周歷抽查如有查辦不  
公散放不實等弊立即據實稟揭從嚴審辦不准  
稍涉姑容至河南撫臣潘鐸購辦米麥二萬九千  
石接濟江省災區業已先後運抵清江委員會同  
斛收所有例給正賑均經先期發銀開放飭據淮  
安府稟覆應將此項米麥撥歸該屬桃源等縣就  
近收貯作為春賞口糧民食較為相宜或專放本  
色或本折搭放隨時酌量辦理其餘各州縣應給

冬賑疊經嚴飭一律核實散放現據陸續稟報設  
廠放竣臣等仍俟派委之司道抽查覆到悉心確  
核總期力祛積弊無濫無遺仰副

聖主軫念民依之至意所有遵

旨派委司道抽查賑務竝撥河南米麥緣由謹合詞恭  
摺具

奏伏乞

皇上聖鑒謹

奏 道光二十九年正月二十四日具

奏奉

硃批核實妥辦貪劣官吏不可倖免一人困苦災黎不  
可輕拋一命庶稍贖朕訾卿等亦當獲福矣勉之毋  
忽欽此



標營坐落災歉地方借支米折餉銀摺子

奏爲江甯八旗及督協漕河各標營坐落災歉地方  
循案借支米折餉銀以資接濟恭摺奏祈

聖鑒事竊照江蘇省所屬各營兵丁偶遇災歉之年歷  
經

奏請借給餉銀分限扣還。有案。茲查江甯八旗及督  
協漕河各標營兵丁均因坐落地方上年夏秋雨  
水過多。江湖河同時竝漲。田禾被淹。成災米薪昂

貴兵情拮据月支糧餉不敷養贍先後請借米折

餉銀接濟內江甯旗營借支兩月米折銀八千二百六十九兩九錢二分四釐請從道光二十九年

正月起分作十箇月扣還督標中營借支銀一千

三百六十八兩左營借支銀一千二百四兩江甯

城守左營借支銀一千一百四十六兩右營借支

銀一千一百八兩奇兵營借支銀一千二百一十

六兩瓜洲營借支銀六百九十八兩浦口營借支

銀七百二十六兩均請從二十九年三月起分作  
十箇月扣還揚州營借支銀二千八十九兩泰州  
營借支銀九百四十七兩六錢泰興營借支銀六  
百二十九兩四錢均請從二十九年秋季起分作  
六季扣還又漕標中營借支銀八百七十三兩左  
營借支銀七百一十六兩右營借支銀七百三十  
六兩城守營借支銀二千八十八兩鹽城營借支  
銀一千六百三十八兩又河標右營借支銀一千

八百九十七兩廟灣營借支銀一千三百三兩七錢均請從二十九年夏季起分作六季扣還洪湖營借支銀五百十五兩五錢請從二十八年冬季起分六季扣還又河中營借支銀二千八十五兩佃湖營借支銀七百六十二兩二錢均請從二十九年春季起分作六季扣還各等情由署江甯布政使積喇明阿核明照數動放具詳前來臣覆查江甯八旗及督協各營均因坐落災歉地方借支

米折餉銀核與成案相符自應准其照數借給以  
濟兵艱除飭將所借銀兩依限扣還外謹會同江  
蘇巡撫臣陸建瀛合詞恭摺具

奏伏乞

皇上聖鑒再此外各營如有續行請借者查明果係坐  
落災歉之區一體借給隨時咨部查考合併陳明  
謹

奏 道光二十九年正月二十四日具

奏奉

硃批該部知道欽此

在籍尙書捐賑議  
叙呈請代奏謝

恩摺子

奏爲據情代

奏仰祈

聖鑒事竊據在籍丁憂前任兵部尙書何汝霖遺屬呈  
稱恭閱邸鈔道光二十八年十二月二十四日內  
閣奉

上諭李星沅陸建瀛奏在籍丁憂前任兵部尙書何汝

霖捐銀二千兩以備本省賑濟等語著准其就近交  
納江甯藩庫兌收何汝霖情殷桑梓踴躍輸將著交  
部從優議敘欽此當卽望

闕叩頭恭謝

天恩伏念上年江鄉猝被水災仰荷

鴻施疊

頒賑撫勉紓蟻悃無補爰微方棉薄之滋慙沐

褒嘉之遠沛猥承



恩眷彌切悚惶惟有叩祝屢豐願閭里羣霑溫飽上紓宸廑偕億兆同樂

昇平所有感激下忱呈請代奏前來臣等謹合詞據情具

奏伏乞

皇上聖鑒謹

奏 道光二十九年正月二十四日具

奏奉

硃批知道了欽此

附奏因病請

假半月片子

再臣自上年冬間偶患兩脇悶脹食輒嘔逆右手  
指亦木強維時正兼河篆旋回省署醫治未敢冒  
昧上

聞入春以來外感風熱仍發肝氣由胸膈串至背脊時  
形脹痛手臂不能自如心口舊有肉結堅實如核  
亦復抽掣作痛近連心絡醫者慮其成疽臣自揣

年力似係有餘之證目前未必爲患少資靜攝當可就痊相應籲懇

慈恩賞假半月上緊調理平復照常任事所有日行文牘暫令江甯藩司代拆代行其稍涉緊要者臣仍慎勉籌辦不致因病延誤謹附片陳

奏伏乞

聖鑒訓示謹

奏

殊批斷不可妄投補藥另有旨欽此內閣奉

上諭李星沅奏患病懇請賞假調理等語李星沅著賞  
假半箇月安心上緊調理欽此

附奏上年捐貲助賑各員片子 並清單

再上年江淮揚等屬被水地方較廣仰荷

聖恩發帑賑撫兼施小民幸無失所惟經費有常自應

兼籌義賑其例賑不及之處與外出窮黎畱養資

送等項所需尙鉅前經 臣 等捐廉倡率分飭籌辦

寮屬亦身先作則俾紳民觀感興起輸助同心或

爲收養之資或作義賑之費除 臣 等倡捐各數業

已附片陳明外查漕運總督 臣 楊殿邦捐銀三百

兩江蘇學政臣青麐捐銀二百兩江甯織造臣銘

海捐銀一千兩蘇州織造臣慶年捐銀三千兩又

江蘇藩臬運司道府均各量力捐廉解存撥用陸

續接濟賑需臣等不敢壅於上

聞謹將司道府捐輸銀錢數目另繕清單恭呈

御覽伏乞

聖鑒此外丞倅州縣及紳民人等捐輸實數容飭藩司

查明另行造冊辦理合併陳明謹

奏

硃批知道了欽此



謹將江蘇省藩臬運司道府捐輸銀錢數目繕具  
清單恭呈

御覽

計開

署江甯布政使積喇明阿捐銀四千兩

前任蘇州布政使李德捐銀一千兩

署蘇州布政使慶端捐銀四千兩

兩淮鹽運使但明倫捐錢一萬串

署江蘇按察使姚熊飛捐銀一千兩

江安督糧道沈兆澐捐銀一千兩

蘇松督糧道倪良燿捐銀二千兩

以二千兩歸江蘇  
二千兩歸安徽

蘇松太道麟桂捐銀二千兩

河庫道法良捐銀二千兩

淮揚道查文經捐銀二千兩

淮海道顏以燠捐銀二千兩

徐州道韓椿捐銀二千兩

前署河庫道周際雲捐錢一千串

前署淮揚道周燾捐銀五百兩

署淮海道胡調元捐錢二千串

兼護鹽巡道江甯府知府徐青照捐銀二千兩

淮安府知府王夢齡捐錢六百串

揚州府知府吳葆晉捐銀二千兩

徐州府知府李正鼎捐銀一千兩

蘇州府知府桂超萬捐銀二千兩

以一千兩歸江蘇  
以一千兩歸安徽

松江府知府練廷璜捐銀一千兩

常州府知府桂文燿捐銀一千兩

鎮江府知府沈濂捐銀五百兩

揀員請調川沙同知摺子

奏爲揀員請調沿海要缺同知恭摺奏祈

聖鑒事竊照松江府川沙撫民同知陳延恩於海運案  
內出力欽奉

諭旨開缺以知府卽補接准部咨於道光二十八年九  
月十四日行文照限減半以十月初九日作爲開  
缺所遺川沙撫民同知係沿海要缺例應在外揀  
選調補臣等查有蘇州府海防同知何士祁年五

十四歲浙江進士卽用知縣籤掣江蘇道光二年  
八月到省

題補常熟縣知縣

奏調元和縣知縣升補松江府川沙撫民同知十八  
年七月丁憂回籍服滿於上海捐輸經費案内奉  
旨仍發江蘇歸候補班補用二十五年四月到省

題補蘇州府海防同知二十七年七月到任臣等覆  
查該員年力富強辦事明敏曾任川沙同知現復

署理是缺以之調補洵堪勝任與例亦符據藩臬  
兩司會詳前來合無仰懇

皇上天恩俯准以何士祁調補松江府川沙撫民同知  
實於地方有裨如蒙

俞允該員係現任同知請調同知銜缺相當毋庸送部  
引

見且係調補要缺任內一切因公處分例免核計現係  
初次請調應完罰俸銀兩仍飭完繳清楚造冊咨

銷所遺蘇州府海防同知選缺江蘇現有應補人員俟奉到部覆另容遴員請補謹合詞恭摺具

奏伏乞

皇上聖鑒訓示謹

奏 道光二十九年二月初四日具


奏奉

硃批另有旨欽此內閣奉

上諭李星沅陸建瀛奏請揀員調補沿海要缺同知一



摺著照所請江蘇松江府川沙撫民同知員缺准其  
以何士祁調補該部知道欽此



南鹽因灾絀運酌籌辦理情形摺子

奏爲南鹽因灾絀運酌籌辦理情形恭摺奏祈

聖鑒事竊淮南鹽務於丁未開綱後經臣酌議章程

奏奉

諭旨督辦節次札飭運司諭催各商早運一引之鹽早  
收一引之課方冀疏銷存積商本周轉從容請運  
漸能踴躍乃值江湖河海上年泛漲異常四五省  
銷鹽引地二十場煎鹽竈舍及儀徵捆鹽沙洲屯

船運鹽繹路同時被水淹漫實從來所未有停捆  
停運幾及半年臣於勘災請賑摺內曾經附

奏在案迨至江水漸落刻期催辦時已冬令報運寥寥統計一歲中運鹽四十萬三千餘引於近年爲最少現查網食各岸未運殘鹽及在途在岸存鹽爲數尙鉅體察全局夙夜籌思據運司但明倫覆稱南鹽當疲敝之候水災重困益深若在乾隆嘉慶年間原不難統銷一綱又可支持數載方今制

用孔亟斷不敢輕言及此惟有劃清殘引趕運新  
綱自戊申綱起專徵新課正銀全完報撥雜項儘  
收儘解無誤要需其戊申以前積欠如鹽規匣費  
利息等項循照辛卯成案暫行停緩俟殘課收回  
補解濟用詳請具

奏前來臣查淮鹺先課後鹽各商納新運舊在場欲  
年運年引在岸必年額年銷歷綱套搭未清前後  
統算佔閣成本不少而殘綱所完雜項又因新綱

雜課未完通融墊用解款轉覺周章該運司於運  
新帶殘之中議應停緩積欠新課既免佔壓殘課  
亦易疏通京外各衙門公需儘收儘解竝有緩納  
雜項收回應付核之庫貯商情兩無窒礙臣以上  
年運務旣因水災致絀本年春單發運未敢稍事  
拘泥已飭運司諭商照議辦理趕緊完課運鹽務  
令解支無缺仍察看運銷情形如有應行變通之  
處隨時酌議

奏辦仰副

聖主塵念淮澨之至意除飭運司查明積欠款項造冊  
呈送咨部外謹繕摺具

奏伏乞

皇上聖鑒謹

奏 道光二十九年二月初四日具

奏奉

硃批戶部知道欽此

特參官運委員顏晉敏等摺子

奏為特參虧欠課本及延不報完之官運委員請

旨分別革職摘頂勒限嚴追以重庫款恭摺奏祈

聖鑒事竊照淮南懸岸向係官運濟銷應完課銀不容

絲毫短欠茲查有委辦安徽貴池官運委員試用

知事顏晉敏承領官鹽三千五百餘引應繳課銀

一萬三千餘兩前因造銷成本核有虧折據運司

呈報委員查辦臣以該知事運銷鹽課因何虧折



計數若干有無續運之引節次札查非但銀不繳  
清迄未分析稟覆又承辦全椒官運委員試用知  
事何錦領捆官鹽二千五百引應繳課銀七千餘  
兩該委員於上年正月內因案撤回節次飭將經  
銷官鹽課銀造報完解亦未據報清楚伏查歷屆  
官運鹽課銷算錢糧之外仍有盈餘繳庫充公近  
年官運各員課銀每不隨售隨解盈餘復未呈繳  
甚至如顏晉敏虧欠課本何錦延不報完經臣疊

札查催猶敢任意懸宕實屬玩誤且恐有侵那肥  
己情事據鹽運使但明倫詳揭前來相應據實

奏參請

旨將試用知事顏晉敏先行革職何錦摘去頂戴交運  
司但明倫澈底清查勒限嚴追完款並令隨繳盈  
餘分別核詳辦理倘逾限無完或查有侵那情弊  
卽由臣提省究追從嚴參辦此外安慶等岸官運  
臣已札飭都司分催售課完報不准再有遷延如

違立予究懲以重庫款而昭儆戒謹會同江蘇巡撫臣陸建瀛合詞恭摺具

奏伏乞

皇上聖鑒訓示謹

奏 道光二十九年二月初四日具

奏奉

硃批另有旨欽此內閣奉

上諭李星沅奏參官運委員一摺兩淮委辦貴池官運

試用鹽知事顏晉敏虧欠課本著先行革職委辦全椒官運試用鹽知事何錦延不報完著摘去頂帶均勒限嚴追完欸竝令隨繳盈餘銀兩不准延宕倘逾限無完或查有侵那情弊卽著嚴參究辦該部知道  
欽此

附奏請升九江水師營守備片子

再臣接准部咨江西九江水師營守備武坤吉前在鹽城營千總任內有疏防停升案件應行退回本汛偵緝所遺守備員缺行令照例題補等因臣查水師營分題補缺出本省如無合例之員例得請

旨簡用江西通省額設內河水師三營惟南湖營有千總一缺現任千總李發春籍隸九江係屬同府與

請升例不符此外並無合例之員所有九江水師  
營守備一缺相應循例奏請

敕下兵部於各省內河水師應升人員內開列請  
旨補放謹會同江西巡撫臣傅繩勛合詞附片具  
奏伏乞

聖鑒訓示謹

奏

硃批兵部照辦欽此

營員查稟互異請撤任審辦摺子

奏爲營員查稟互異請

旨撤任審辦以肅營制恭摺奏祈

聖鑒事竊臣接據署常州營遊擊裕昆稟據該營署右軍千總張斌把總嚴福外委胡坤等稟守備張九如放餉遲延以致兵丁辭退該遊擊委員往查張九如已離汛地遞稟巧飾嗣復親赴查明本年春季兵餉未放當於遊擊俸廉內先行墊給等情竝

據守備張九如以春季餉銀於上年十二月二十  
六日經外委胡坤領回當同隊目王世忠等取去  
三百兩分散各兵等詞來臣衙門遞稟請究臣以  
張九如領回餉銀並不照例移貯縣庫按月當堂  
散放輒任弁目散給各兵實屬錯謬且與遊擊裕  
昆所稟不符當將張九如撤任飭委署江甯城守  
協副將恩長會同署常州府知府洪玉珩遊擊裕  
昆查訊稟覆參辦去後茲據恩長洪玉珩稟稱提



奏奉

硃批另有旨欽此內閣奉

上諭李星沅奏營員查稟互異請撤任審辦一摺江蘇常州營散給兵餉遊擊裕昆與守備張九如所稟不符經該督委員會訊始行供出種種支離恍惚顯有高下其手散給不均及藉端剋扣情弊裕昆著交該督撤任行提人證卷宗嚴審確情按律擬辦餘著照所擬辦理該部知道欽此

奏請展假半月調理摺子

奏爲微臣假期已滿病勢未痊籲懇

恩施俯准展假調理恭摺奏祈

聖鑒事竊臣前因入春後肝氣復發胸口肉結作痛請  
假半月調理奏奉

硃批斷不可妄投補藥另有旨欽此道光二十九年二  
月初七日奉

上諭李星沅著賞假半箇月安心上緊調理等因欽此

祇悉之餘曷勝欽感連旬服藥內治專主順氣平  
肝清散浮火積痰尙未妄投猛劑惟肝患總未平  
復背脇悶脹俯仰不能自如又添腹間氣墜夜常  
數起肉結部位偏近心絡時復抽掣痛楚皮色深  
紅肌裡亦加緊束據醫家云病由積勞內鬱春令  
木旺失調尙須專意靜攝等語臣渥膺

重寄夙夜未遑何敢誓圖將息且氣體充實平日頗足  
耐勞偶遇微疴絕不介意無如目前病證未能迅

速就痊愈上緊愈難安心仰荷

慈塵刻深焦急不揣冒昧續懇

賞假半箇月醫調凡有緊要事件臣仍力疾辦理設再  
調治無效另容據實上

聞務全報

國之身勉效致身之義不孟浪以投藥不因循以誤  
公所有微臣患病續假緣由謹繕摺具

奏伏乞

皇上聖鑒訓示謹

奏 道光二十九年二月二十日具

奏奉

硃批另有旨欽此內閣奉

上諭李星沅奏患病懇請展假調理等語李星沅著再賞假半箇月安心調理欽此

籌修江甯水關閘座涵洞摺子

奏爲籌修江甯省城東西水關等處閘座涵洞以防  
水患恭摺奏祈

聖鑒事竊照江甯省城地濱大江一遇上游盛漲下則  
海潮頂托水無歸注疊致淹及城廂而上年爲尤  
甚臣於冬令水退後每與寮屬紳士熟商捍禦之  
策咸以城內河道如秦淮青溪運瀆等處曾於道  
光十一年勸捐挑浚經前督臣

奏明在案所有東西水關及後湖等處向皆設立關  
座涵洞旱澇藉以蓄洩無如年久坍塌啟閉不靈  
從前被水年分往往捐築土壩抵禦江潮因在已  
淹之後仍無裨益且省河通潮處所民間食水攸  
資平時又難堵塞爲今之計先須查照水誌修復  
閘洞防患未然等語當經臣飭委北捕通判孫炳  
煒會同上元江甯二縣前往逐一詳勘共閘座八  
處及各處涵洞就原設基址分別拆修重建並置

寬厚開板估需銀二千五百兩開單稟覆前來臣  
查省城重地屢值江水灌溢無可疏通官署民房  
均多波及卽貢院號舍時亦被淹凡有可以設法  
保衛者亟應次第籌辦本年又值鄉試今議修復  
開洞旣堪捍患宜先舉行惟地方捐賑甫竣勢難  
再資民力卽由臣捐廉飭交江甯府知府徐青照  
會督廳縣及公正紳董趁此春水未生集匠購料  
趕緊興工一律修建完整以期有備無患竝飭查



探水蹟再加諮訪或高寬丈尺應行比舊增修或  
啟閉機宜應行擇要添造及此外尙有禦水之法  
另容率屬籌捐隨時酌辦謹將臣現辦省城閘座  
涵洞情形恭摺具

奏伏乞

皇上聖鑒謹

奏 道光二十九年二月二十日具

奏奉

硃批另有旨欽此內閣奉

上諭李星沅奏籌修省城開座涵洞一摺江甯省城東西水關及後湖等處向設有開座涵洞爲旱澇蓄洩之資年久坍塌損啟閉不靈自應趕緊修復以防水患所有估需工料銀二千五百兩著准其辦理卽督率該府廳縣等及早興工一律修建完整以期有備無患餘著照所擬辦理該部知道欽此

縷陳南漕分成改折易滋流弊摺子

奏爲南漕分成改折易滋流弊恭摺縷悉陳

奏仰祈

聖鑒事竊臣接准戶部行知以臣前奏抽查折漕力求  
有利無弊一摺現經王大臣會議覆奏竝開呈折  
漕酌辦章程六條奉

上諭著李星沅卽會同江蘇浙江巡撫將新議與舊章  
悉心參酌妥辦等因欽此當卽欽遵恭錄咨會江蘇

浙江撫臣屏除意見體察會商另摺奏請

訓示伏查造報積欠一節前次奉到

諭旨卽同江蘇撫臣飭司督屬依限趕辦竝

奏明添派委員提催臣前摺所陳語多懸慮蓋爲實  
銀籌補非爲實帳報查且爲抽查計期非爲清查  
展限茲荷

重申異命諄切詳明益當凜遵盡一不准稍有遲誤至  
南漕改折一節果能勉循

恩諭因地制宜以甦民困及王大臣原議一轉移間經費有補此變通盡利之舉奚容以難辦爲詞臣所見爲難辦者惟恐

國計民生功效未能立應而或不肖州縣明開浮勒之端不法吏胥暗長訛索之漸曷敢輕於嘗試臣前摺首重採買於折徵意有未盡謹再爲

聖主披瀝言之查戶部則例內載漕米改折江蘇粳米每石折銀一兩粟米每石折銀七錢五分正改兌

米每石折銀一兩二錢例價爲數甚輕照此折收  
官民稱便惟南方糧值賤北方糧值貴加以水陸  
運腳非例價所能採買不得不酌量議增而示諭  
例有明文漕政攸關迥非州縣通融辦法若就州  
縣折色分別輕重等差無論各州縣情形不同卽  
一州一縣中情形亦各不同治絲而棼幾無端緒  
且不能舍戶部定例轉執州縣勒價爲憑多則徵  
收不前官項又將那墊少則採買不足倉儲涸致

周章此

國計之難也通行一條鞭徵法易知易從今以某州縣額漕內應折米若干某里某戶額漕內又應折米若干數目奇零催科細碎糧冊糧票開載愈煩且如折銀完漕按照市價而銀價時有長落將今日少完明日復多完乎年景時有豐歉將今歲少取明歲復多取乎小民正愁穀賤兼值銀荒以有易無展轉虧折而又不得確數輸將恐後仍歎追

呼此民生之難也。州縣藉有幫需，不免私收折色。然以羨補不足，尙未敢顯著爲令。且皆制錢洋錢，隨便抵算。非若折漕解部，必須一色現銀。今如明示折收，又未通行定價。州縣將無顧忌，假公濟私。甚至爲通收分解之弊，徵收從重，報解從輕。幫需爲盈餘，併火耗以加費。迨經查出，參究閭閻受累已深。况運費能減，不能裁。如令折色若干，全行解部本色若干，將何交幫勢。非折而又折不止。此



防州縣浮勒之難也吏胥爲良民害由來久矣江蘇漕額最重科則最重糧書經造勾串詐混亦最重卽照定額徵漕弊已屢出若復兼收折色聽其參差不齊此輩因緣爲奸更可高下其手多一名色多一利孔本官固爲所挾持上司亦不勝拏辦脂膏朘削究惟編氓任之此防吏胥訛索之難也夫法窮則變原可更新變而難通不如守舊臣有統轄之責旣未能力全漕額豫擬豐收復何能膠

執臆說茲事體大他省賦輕額少或可議行獨於  
江蘇時勢揆度利害總覺行之維艱同一爲

國爲民王大臣籌議於內疆吏籌辦於外均非意存  
成見伏讀

上諭準米折銀以百萬石爲率係約略之詞亦在該督  
撫等權衡緩急施行欽此又王大臣奏稱不得已議  
及折徵如何核辦方臻妥協等語仰見

宵旰勤求盈廷襄贊祇期萬全無弊此中委曲繁重卽

臣備員江省亦未敢自信周知欽奉

飭發折漕酌辦章程六條謹當會同江浙撫臣再三悉心參酌或兼新議或仍舊章或民折官辦地方徑行解銀赴部或帶徵緩漕屆限專款折銀報完利取諸因事惟其便不敢以一奏塞責此摺力疾劄稿謹縷悉陳

奏伏乞

皇上聖鑒謹

奏 道光二十九年三月初三日具  
奏奉

硃批原議王大臣等會同戶部議奏欽此

特參六安州知州文廷杰摺子

奏爲特參擅設查鹽局卡之直隸州知州請

旨撤任訊究以維票法恭摺奏祈

聖鑒事竊照淮北票鹽章程所過州縣營汛止准隨時  
驗票放行不得私設局卡畱難需索前因風聞安  
徽六安州及五河鳳陽等縣有設卡掌秤點包索  
費之事當經咨會撫臣查辦一面密切委查旋據  
查覆六安州北門外馬頭設有卡房凡票鹽由該

處至霍山英山售賣者過卡時查明包數每包索  
費錢五十文方准放行係該州家屬文錫春丁役  
傅升徐振先夏奎等經營臣正在核辦聞據六安  
州知州文廷杰稟稱該州境內淠河一道爲票鹽  
船筏所必經北城外河干前設驗票局一處票鹽  
到彼驗放丁役人等竝無藉索規費等語臣查票  
鹽在今日所以稍勝於綱鹽者惟其事簡費輕運  
銷無阻藉可招徠民販乃六安州擅立鹽卡雜按

包索費尙未訊有確供而故違定章設局驗票該  
州已稟認不諱若不澈底查究他處相率效尤則  
凡行銷四十二州縣必至節節留難票商聞風裹  
足於北鹺大有關繫且旣派有家屬丁胥據稱竝  
無需索規費殊難憑信辦理實屬荒謬據該管司  
道等揭報前來相應請

旨將安徽六安直隸州知州文廷杰先行撤任所派管  
局家屬丁胥勒令按名交出押解來省由臣委員

嚴審究辦竝飭卽將局卡拆除以免滋累此外五  
河等縣如有需索情事查實一併嚴懲又河南省  
行銷淮鹽各地面誠恐亦有此弊臣鹽政衙門例  
得管理容俟委員往查竝咨會河南撫臣據實另  
辦斷不敢稍涉引嫌致壞票法謹會同安徽撫臣

王植合詞恭摺具

奏伏乞

皇上聖鑒訓示謹



奏 道光二十九年三月初三日具

奏奉

硃批另有旨欽此於文廷杰三字旁奉

硃直竝奉

硃批不奏請革職何待欽此內閣奉

旨這所參擅設查鹽局卡之安徽六安直隸州知州文廷杰著卽革職交該督提同管局之家屬丁胥人等嚴審究辦其私設局卡著卽拆除以肅鹺務餘著照

所擬辦理欽此

附奏運鉛人員請借銀兩片子

再前准部咨運鉛人員遇有遭風沉溺請借銀兩  
必當查勘確實核計水深丈尺俟事竣

奏明酌借等因茲有貴州委員貴定縣知縣胡霖澍  
領解已酉年上運一起京鉛行抵江甯縣草鞋夾  
地方第十一號鉛船一隻遇風撞壞登時沉溺鉛  
十萬二千三百勛雇夫如數撈獲歸幫載運計水  
深五六丈不等每百勛准銷銀四錢四分共應銷

銀四百五十兩一錢二分稟由江甯布政使馮德馨查明應銷銀數與部定章程相符具詳請借前來臣覆核無異除批飭於司庫二十八年雜稅款內借給催償前進並咨黔省於該員養廉及報銷銀內扣繳造報江省作正開銷暨咨部外謹循例附陳伏乞

聖鑒謹

奏

硃批戶部知道欽此

李文恭公奏議

卷二十一 江督

垂

附奏調署江都縣知縣片子

奏再署江都縣知縣許道身現經飭赴句容縣新任  
所遺江都縣員缺地當沿河衝要案牘較繁查有  
興化縣知縣梁園棣堪以調署據藩臬兩司會詳  
前來除批飭遵照外謹會同江南河道總督臣楊  
以增合詞附片陳明伏乞

聖鑒謹

奏

硃批覽欽此

揀員升署京口左營游擊摺子

奏爲揀員升署內河水師遊擊恭摺奏祈

聖鑒事竊照京口左營遊擊武迎吉越缺升署京口內

河水師副將所遺京口左營遊擊係內河水師題

補之缺原駐靖江現經移駐江陰改爲京口協標

中營遊擊一切督率備弁操防礮堤巡緝江面必

須熟悉情形勇敢強幹之員方克勝任現在內河

水師都司內竝無歷俸已滿之員惟查有升署高



資營都司李德麟年四十歲鎮江府丹徒縣人由太湖營兵丁遞拔千總道光二十四年請升廟灣營守備奉部覆准因承辦江防事宜未經引

見旋請升署高資營都司二十七年十一月引

見奉

旨李德麟准其升署江南高資營內河水師都司欽此由部給劄於二十八年正月到營任事委署京口左營遊擊年餘以來辦理悉臻妥協該員壯實勤

敏熟習槍礮曾獲盜梟各犯多名防堵受傷歷署  
京口遊擊守備各事務以之升署新改京口協標  
中營遊擊責令辦理移駐營汛事宜可收駕輕就  
熟之效惟該員升署都司尙未實授與例稍有未  
符伏查水師升署人員未經實授復請升署均蒙  
恩准有案臣爲人地相需起見合無仰懇

聖恩俯准將都司李德麟升署新改京口協標中營遊  
擊於水師營伍地方均有裨益如蒙

俞允該員引

見未滿三年毋庸送部仍俟扣滿守備都司歷俸另請  
實授除飭取履歷咨部外謹會同署江甯京口將  
軍臣惠年江南提督臣尤渤合詞恭摺具

奏伏乞

皇上聖鑒訓示謹

奏 道光二十九年三月十七日具

奏奉

硃批兵部議奏欽此

遵

旨興辦沛縣寨子堰摺子

奏爲遵

旨奏聞仰祈

聖鑒事竊臣李星沅於道光二十九年三月十一日接  
准部咨內閣奉

上諭前據鍾祥奏沛縣寨子堰工程請仍歸江南省民  
辦當交軍機大臣會同該部速議具奏茲據該大臣

等核議具奏運河一帶堤堰工程分別官修民修辦理本有舊章若將民築民修之工紛紛改爲官辦工費日增何所底止所有寨子民堰工程前據李星沅等請改歸東河廳員經管之處著毋庸議惟該處爲運道所關著李星沅陸建瀛會同楊殿邦楊以增迅卽查照該堰歷屆修工成案一面奏聞一面剋日興辦其滾壩是否必須添設卽由該督撫等酌量妥辦等因欽此祇聆之下當卽咨行欽遵辦理臣等伏

查沛縣寨子堰工程從前民築民修本係自衛田

廬非爲官河濟運近因十字河漫水衝擊屢築屢

坍塌地盡沒水中編氓頻年失業臣等極知改歸

官辦經費攸關無如民田旣淹借款攤還究恐有

名無實且民堰在臨湖官灘之上卽爲東河官地

取土甚難每當運河下閘水勢擡高堰工輒多漫

決又沛縣離工七十餘里中隔昭陽一湖竝無河

兵額夫更慮鞭長莫及是以前摺援案請歸東河

廳員就近修守欽奉

諭旨嚴切何敢再事瀆陳計日重運經臨惟當先其所  
急上緊飭辦已由臣李星沅札委候補道周燾兼  
程馳往會督該管道府及浦縣確勘寨子堰坍缺  
工長丈尺撙節估計循照歷屆成案或酌定段落  
勸民分認承修或先行借

帑興辦事後攤徵還款爰速分別酌籌辦理竝責成  
浦縣知縣督率人夫一律修培高厚不准草率稽



延有誤漕行至該處內河外湖歲逢伏秋水漲一  
線民堰其勢可危卽堰工修竣後亦必另籌分洩  
去路以期一勞永逸現經臣等札飭徐州道府會  
同委員周燾親詣馬便汪等處週歷勘明形勢是  
否添設滾壩足資蓄洩竝籌議經費稟由臣等會  
商核辦所有委勘寨子堰工程遵

旨興辦緣由謹合詞恭摺覆

奏伏乞

皇上聖鑒謹

奏 道光二十九年三月十七日具

奏奉

硃批知道了欽此

九江水師營守備衙署移建府城西門摺子

奏爲江防守備駐劄地方今昔異宜勘明移建以重

巡防恭摺奏祈

聖鑒事竊照江西省九江鎮標額設水師守備一員有  
巡防江面兼轄陸路之責前因九江關在九江府  
城北門外老鸛塘地方該守備衙署兵房亦卽建  
於該處藉資彈壓迨後九江關移設府城西門外  
江干往來船隻聚泊關前商賈居民亦多遷徙附

近老鸛塘遂成僻地道光二十八年七月老鸛塘  
被水守備衙署兵房全行衝坍據九江府知府劉  
熾昌議請移建府城西門外由藩臬兩司會同該  
管道員飭委南康府知府邱建猷會營親詣勘明  
老鸛塘委係空曠荒郊迥非關市要隘西門外逼  
近大江商船輻集一經守備移駐水陸均可巡防  
竝查明西門外原有營房基址四面隙地間房照  
依民間時值收買足敷建造守備衙署竝外委營

汛兵房等項詢問居民亦皆樂從竝無窒礙之處  
所有此項經費查該守備原建衙署兵房被水衝  
坍共估修復銀八百餘兩即可移爲改建之用至  
老鶴塘地方經前任守備武坤吉捐廉搭蓋兵房  
六間應卽作爲老鶴塘汛撥兵十名分防巡緝更  
爲周密會詳請

奏前來臣等伏查九江水師營守備雖有陸路汛地  
而責任江防自當駐劄濱江處所以資操緝原駐

老鶴塘衙署既已被水衝坍現擬移建西門外江干係屬因地制宜應請准其移建所需工料銀八百餘兩俟奉

恩准再行飭司取造冊結照例辦理謹合詞恭摺具奏伏乞

皇上聖鑒敕部核覆施行謹

奏 道光二十九年三月十七日具

奏奉

硃批該部議奏欽此

臚陳疽患難以速痊懇

恩開缺回籍調理摺子

奏爲微臣疽患難以速痊籲懇

鴻慈俯准開缺回籍調理恭摺奏祈

聖鑒事竊臣前因假期已滿病勢未痊奏請展假調理  
三月十四日奉到

硃批另有旨同日奉

上諭李星沅著再賞假半箇月安心調理欽此臣自顧



何人渥蒙

優眷感激涕零連旬上緊醫調亟思病痊銷假乃久服  
湯藥肝氣仍未寬舒肉結漸長白泡將潰未潰醫  
者認爲痰疽必須拔毒去瘀從容敷治遽難刻期  
見功臣以肝陽失調尙非痼疾可比所苦疽由氣  
阻鬱痛胸間遇事勞心輒同鍼刺雖屬有餘之證  
而攻之不可散之不能展轉煩憂有甚於痼疾者  
伏念臣受

恩深重圖報日長但使一息尚存奚忍自甘頽廢祇以  
兩江鉅任臣卽竭全力常懼弗勝况茲剝膚近災  
犬馬依戀之忱猶冀餘生自效若稍遷延諱飾勉  
強目前恐至貽誤地方臣咎更無可追惟有懃陳  
下悃顙懇

聖主矜全准臣開缺回籍調理一俟疽患痊愈卽速趨  
叩

闕廷求

賞使斷不敢希圖安逸上負

生成所有兩江總督員缺懇

恩迅賜簡放竝擬循案移交江蘇撫臣先行接署以重  
職守恭候

命下遵行臣不勝戰栗欽竦之至謹繕摺具  
奏伏乞

皇上聖鑒訓示謹

奏 道光二十九年三月十七日具

奏奉

硃批另有旨欽此內閣奉

上諭李星沅奏病難速痊懇請開缺一摺李星沅著准  
其開缺回籍安心調理兩江總督著陸建瀛補授江  
蘇巡撫著傅繩勛調補均著迅速前赴新任毋庸來  
京請訓江蘇巡撫著程煥采署理江西巡撫著費開  
綬署理欽此

請將疎防洋盜之總兵交部議處摺子

奏爲查明江蘇洋面現在情形並將疏於防範之總兵請

旨交部議處恭摺具

奏仰祈

聖鑒事竊照江蘇洋面遼廓水師責在巡防前經

奏明勸諭上海紳商雇募勇船隨同官兵直搗浙江南漁山盜巢十次獲盜拾船先後解省審辦並飭

蘇松鎮總兵田浩然巡緝江浙交界之馬蹟山以扼盜船來路福山鎮總兵孫雲鴻駐巡佘山接應往返商船數月中較爲安靜嗣據探報閩浙盜船因江蘇兵勇搯住要隘不能飛越北來有往陳錢山外極東大洋者臣等當查陳錢山之東一望無際莫知紀極向爲商船所不到盜匪無可窺伺必將繞過馬蹟佘山趁有不虞闌入滋掠卽經嚴飭該鎮等確探追捕一面飛咨鄰省協力偵防旋據

稟報余山西北雞骨礁等處洋面自二月十二日  
起至二十六日有沈洪順等商船被劫之案均因  
兵勇各船聞風救護有已劫去貨物者亦有竝未  
失物者尙無擄捉人船情事該鎮等督飭兵勇復  
於三月初四日在陳家沙洋面見有盜船四隻勢  
將圍劫商船卽行合力迎擊自卯至午追至戲臺  
沙洋面擊沉盜船一隻全船盜匪漂沒餘船轉往  
南竄該兵勇仍向追趕直至酉時在陳家沙之東

擒獲盜船一隻盜犯六名割取首級一顆餘盜紛  
紛落水尙有盜船二隻向東逃駛時已昏暮無從  
跟追臣等查該盜匪恃其亡命游魂海上出沒無  
常始則伺劫於商船必經之所近因扼要堵禦復  
敢別生刁狡繞道極東外洋乘間圖掠實堪髮指  
總兵田浩然等分段巡守雖有鞭長莫及之勢究  
屬疏於防範未便因其事後獲盜擒船稍存寬貸  
相應請



旨將蘇松鎮總兵田浩然福山鎮總兵孫雲鴻交部議處仍責成該鎮等鼓勵兵勇加倍奮勉勦捕以期洋面肅清仰副

聖主綏安海寓之至意除飭司將現獲盜犯提省審究盡法懲辦外謹會同江南提督臣尤渤合詞恭摺具

奏伏乞

皇上聖鑒訓示謹

李文恭公奏議

卷二十一 江督

空

奏 道光二十九年三月二十六日具

奏奉

硃批另有旨欽此內閣奉

上諭李星沅陸建瀛奏請將疏防盜船行劫之總兵交部議處一摺江南蘇松鎮總兵田浩然福山鎮總兵孫雲鴻於沈洪順等商船被劫之案雖有檢獲究屬疎於防範田浩然孫雲鴻均著交部議處欽此

輪閱江防礮堤並捐辦礮位完竣摺子

奏爲春季輪閱江防礮堤並製造熟鐵礮位等項均經捐辦完竣發營練習恭摺奏祈

聖鑒事竊照大江南北兩岸礮堤查照定章按季輪演上年秋冬二季因江湖泛漲礮堤多有衝損

奏明俟今年春間出臣週歷演閱適臣因病請假弗克前往當卽咨會署江甯將軍臣惠年並飭委狼

山鎮總兵王鵬飛將五龍山沙洲圩北固山象山

順江洲上下圖山關之大磯頭二磯頭東生洲三  
江口之固土洲西成洲鷺鼻嘴之大小石灣劉閩  
沙等處礮堤土檔土墩分別查閱一律修築完整  
礮蓋等項油艫堅明各路礮兵裝藥點火益臻熟  
練其護礮接應官兵施放烏槍擡礮步伐整齊聲  
勢亦皆聯絡尙無應劾之處至濱江泅水兵丁經  
臣節次捐銀飭募熟習水性身材趨健之人頂補  
名糧勤加教練年餘漸有起色惟大礮力雖致遠

而體質過重轉運維艱祇可作爲正兵不能出奇  
制勝前經臣奏明添造熟鐵礮空心炸彈以備隨  
時調用奉

上諭所見甚是等因欽此卽飭委員在省督造製成礮  
六十三位礮架三十五座空心炸彈除試放外尙  
存三百十三出竝所鑄實心彈子逐礮試驗圓滑  
堅凝膛口合式運用極爲靈便喫藥受彈勦兩與  
礮身比較重輕倍於生鐵大礮致遠亦復相等礮

兵不患炸裂心膽俱壯試放有準其炸彈一項聲  
談悚人有事尤爲利器經臣派發京口協營二十  
位鎮江營二十位臣標中軍二十三位空心炸彈  
亦酌分三處妥爲收貯卽責成該將等隨時督率  
演習竝教以揣度地勢用正用奇臨機策應之法  
務使弁兵心領神會精益求精與涵水兵丁相輔  
而行仰副

聖主慎重江防之至意所有工料價值臣已隨時捐發

毋庸另籌款項再臣前因沿江礮堤原備鐵彈與  
大礮多不合腔

奏明逐礮試配添收另鑄並修整礮蓋加備鎖鍊需  
用請於善後款內支給嗣經鑄配齊全由臣陸續  
捐辦原動善後銀款查明發還司庫合併陳明謹  
會同署江甯將軍臣惠年恭摺具

奏伏乞

皇上聖鑒謹

奏 道光二十九年三月二十六日具

奏奉

硃批知道了欽此



附奏請獎出力水勇片子

再臣等前因江蘇水師廢弛已久雖經極力整頓驟難轉弱爲強計惟破格用人可望振興士氣不得已籌募水勇擬將尤爲出力者

奏請拔入水師優加鼓勵奉准部覆咨令先行入伍仍取具該管官及紳商保結若能始終勤奮竝無爲匪不法及不遵約束等事再行酌量拔補自應遵照辦理惟查此次水勇係由紳商公舉素有身

家之周鼇胡維榮充當總頭再由該總頭另舉誠實無過之人作爲頭目每頭目一名各帶散勇數名數十名不等仍聽周鼇胡維榮約束前有水勇頭目武生周永清被拒受傷落海身死奉

旨從優賜卹卽係總頭周鼇之子現存頭目中亦尙有武生職監在內是總頭頭目二項來歷本各分明江蘇水師在洋與盜船接仗之事向所罕有自上年六月周鼇胡維榮管帶水勇隨同官兵出洋後

該官兵互相角勝耳目一新數月以來兵勇共追  
勦十一次生擒盜犯一百十四名擊殺及落海身  
死者不計其數牽獲盜船十一隻擊沉盜船六隻  
救回被裹商船三十二隻被擄難民一百三十餘  
名竝無妄拏爲匪及不遵約束情事著有成效人  
所共知現在水師出力弁兵經臣李星沅核計功  
績陸續遞行升拔而遇事敢前認真出力之總頭  
周鼇胡維榮以非營兵出身獨未獲邀獎敘似覺

向隅更恐壯志一隳各懷觀望勇不赴募兵無應  
援水務泄沓如恒遂致前功盡棄殊爲可惜查江  
蘇洋面擊擒盜船周菴在水勇中首先冒險其赴  
浙江洋面搗穴焚巢則以胡維榮爲最洵屬始終  
勤奮臣等不敢壅於上

聞可否仰懇

天恩俯念洋面微勞將周菴胡維榮一併

賞戴藍翎以外海水師千總酌量拔補之處出自

鴻施逾格如蒙

俞允仍照部咨取具各結備案臣等爲整刷水師亟收  
人材起見謹合詞附片具

奏伏乞

聖鑒訓示謹

奏

硃批另有旨欽此內閣奉

上諭李星沅陸建瀛奏水勇始終勤奮請予獎勵等語

李文恭公奏議

卷二十

江督

五五

江蘇水師自添設水勇以來數月之中屢著成效水  
勇總頭周鼇胡維榮始終勤奮自應量予恩施周鼇  
胡維榮均著以水師千總酌量拔補并俱賞戴藍翎  
以示獎勵該部知道欽此

附奏辦理戰船片子

再臣前因江蘇外海水師戰船不敷議請籌捐添造竝於善後餘存銀內先行提撥趕造十隻以爲之倡奏蒙

俞允飭辦適值上年水患勸諭捐輸爲收養助賑補苴漕額之計以致籌捐戰船不能同時竝舉現在災務漕務次第完竣自應趕將戰船接續籌捐以備應用其倡造船十隻亦因沿江一帶被水難於置

廠施工直至冬底涸復始就江甯上海兩處分設  
船廠飭委江甯府江防同知陳在文候補道吳健  
彭督同弁委購料選匠每廠各造船五隻現亦據  
報葺事一俟調到水師弁兵演試驗收分別發營  
配額此十船內所需火器業經臣將陸路各營餘  
存礮位查明調驗擇其大小合宜體質堅利者捐  
廉修整裝配江甯省廠船五隻尙不敷劈山礮二  
十位亦經臣捐造足數上海廠五船礮位飭令蘇



松太道督同上海廳縣就近成造此後捐造船內  
之礮均各隨船捐辦計數請獎所有辦理戰船情  
形謹附片陳明伏乞

聖鑒謹

奏

硃批所辦好欽此

請修兵房營房等工估需銀款摺子

奏爲請修兵房營房等工估需銀款循例具

奏仰祈

聖鑒事竊照地方一切工程前奉

諭旨暫行停止其營汛卡房等項工程爲兵丁棲巡之所咨部准辦在案茲據江甯布政使馮德馨詳稱

上元縣境內正陽門門禁兵房三間上屆於道光十七年修竣固限已逾樑柱脫落墻垣坍塌急應

興修由司飭據江甯府移委江防同知親勘屬實  
估需工料銀一百七十三兩三錢八分一釐又泰  
興縣境內遷善舖口岸黃家港包家橋監獄北水  
關小西門西水關等汛營房上屆於嘉慶十七十  
八等年興修久逾固限坍塌不堪亟須修整由司  
飭據通州知州委據如臯縣詣勘屬實估需工料  
銀八百四十一兩九錢九分七釐各具勘結送由  
該管道府州並狼山鎮總兵飭委營員覆勘明確

均係必應修辦之工遞核結轉由縣確估工料銀兩造具冊結送司應請准其興修通共估需工料銀一千一十五兩三錢七分八釐請於司庫耗羨款內動給興修詳候具

奏前來臣查此項兵房營房等工兵丁藉資止息既據委員詣勘實因年久坍塌前修固限久逾自應准其興修所有估需銀兩合無仰懇

聖恩俯准在於司庫耗羨銀內動支給辦以資戍守除

送到勘結隨案咨部並飭造估計冊結另行詳辦  
外理合循例具

奏伏乞

皇上聖鑒敕部核覆施行謹

奏  
道光二十九年三月二十九日具  
奏奉

硃批工部議奏欽此

揀員請補桃源縣知縣摺子

奏爲揀員請補沿河要缺知縣恭摺奏祈

聖鑒事竊照桃源縣知縣姚維成調補甘泉縣知縣所遺桃源縣知縣係衝繁難兼三沿河要缺例應在外揀選調補該縣地處衝途民情强悍時有梟匪出沒且當黃運兩河要工林立及催償銅鉛漕運均關緊要必須精明強幹之員方足以資治理臣等於通省實缺知縣內詳加遴選非現居要缺卽

人地未宜一時揀調乏人惟查有河工候補知縣  
吳棠年三十七歲安徽舉人大挑一等旋挑河工  
引

見奉

旨以知縣用欽此籤掣南河道光二十四年五月二十  
四日到工二十六年試用二年期滿因防汛出力  
二十七年十月十五日奉

旨著免其借補以沿河知縣補用欽此該員年強才穩

辦事勤明以之請補桃源縣要缺知縣洵堪勝任  
與例亦符合無仰懇

天恩俯准以吳棠補授桃源縣知縣於河工地方均有  
裨益如蒙

俞允該員係候補知縣請補知縣銜缺相當毋庸送部  
引

見亦毋須查造參罰據藩臬兩司會詳前來謹會同江  
南河道總督臣楊以增合詞恭摺具



奏伏乞

皇上聖鑒訓示謹

奏 道光二十九年三月二十九日具

奏奉

硃批另有旨欽此內閣奉

上諭李星沅陸建瀛奏揀員請補沿河要缺知縣一摺著照所請江蘇桃源縣知縣員缺准其以吳棠補授該部知道欽此

揀員請升蘇松鎮標中營守備摺子

奏爲外海水師守備現無合例應補之員援案遴選  
請升恭摺奏祈

聖鑒事竊照蘇松鎮標中營守備陳其恕升任遺缺駐  
劄太倉州崇明縣地方例應於隔府別營內遴員  
題補臣查現任各千總非籍隸本州卽拔補尙未  
受劄及有疏防事故實無合例應升之員惟吳淞  
營千總徐克明年四十八歲太倉州寶山縣人由

吳淞營兵丁游拔今職道光二十六年正月受劄  
該員操緝勤能熟習槍礮屢獲私梟船犯歷俸已  
滿一年以之請補守備可期勝任第籍屬太倉州  
循例應行迴避因查廣東內河水師守備缺出如  
無合例之員准於籍隸本府人員內遴選題升江  
省蘇松鎮標遊擊守備二缺經臣援例請將籍隸  
本州之守備毛正和千總龔成良升補均蒙

恩准在案今蘇松鎮標中營守備員缺事同一例可否

仰懇

聖恩俯念水師人材難得准將千總徐克明升補蘇松  
鎮標中營守備毋庸迴避本籍之處恭候

欽定如蒙

俞允另行給咨送部引

見除查取履歷咨移部科外謹會同江南提督臣尤渤  
合詞恭摺具

奏伏乞

皇上聖鑒訓示謹

奏 道光二十九年三月二十九日具

奏奉

硃批兵部議奏欽此

附奏運鉛人員請借銀兩片子

再前准部咨運鉛人員實因遭風沉溺及守壩讓  
漕等事請借銀兩必當查勘確實核計水深丈尺  
及守護各日期分別

奏明酌借所借之數不得浮於應銷之數等因在案  
茲有貴州領解已四年上運一起京鉛委員貴定  
縣知縣胡霖澍因運抵江蘇瓜州青龍港地方適  
值河道凍結守凍五十餘日核計食米鹽菜銀兩

應領之數已在五百兩以外請借守凍銀五百兩  
稟由江甯布政使馮德馨查明任守日期請借銀  
數均符定章應行借給詳請具

奏前來臣覆核無異除批飭於司庫道光二十八年  
雜稅款內照數借給催令儻運前進竝咨黔省於  
該員應得養廉及報銷應找銀內扣繳造報江省  
作正開銷暨咨部外理合附陳伏乞

聖鑒謹

奏

硃批該部知道欽此



恭報交卸兩江總督篆務叩謝

天恩摺子

奏爲恭報微臣交卸回籍日期叩謝

天恩仰祈

聖鑒事竊臣接准吏部行知四月初四日奉

上諭李星沅奏病難速痊懇請開缺一摺李星沅著准其開缺回籍安心調理兩江總督著陸建瀛補授等

因欽此跪誦之餘感戴曷極伏念臣楚南寒峻由

翰林通籍十有八載渥蒙

恩知特達簡擢優加洊歷四省封圻旋膺兩江重任

鴻施稠疊超越尋常

皇上不以庸劣視臣亦不以庸劣自視駑驅黽勉亟

欲殫精竭慮維持艱鉅以期稍效涓埃何圖福薄

灾生驟致疾痛交作兩次陳懇

賞假醫治仍未見功復經奏奉

溫綸准令開缺回籍安心調理仰荷

天地生成之德彌殷朝夕銜結之思茲於四月十五日  
謹將兩江總督兩淮鹽政關防各一顆竝

王命旗牌等件派委江甯府知府徐青照督標中軍副  
將松安齋送新任兩江督臣陸建瀛接收臣扶病  
假裝暫由水路南返惟當專心靜攝外證早獲醫  
痊卽行匍匐入都祇謁

天顏載申依慕臣力有限臣願無窮一縷血誠矢諸寤

寐望

關瞻戀不知所云除將交卸日期循例恭疏

題報外謹繕摺叩謝

天恩伏乞

皇上聖鑒謹

奏 道光二十九年四月十五日具

奏奉

硃批一俟痊愈卽行來京朕切望之至卿當諒之欽此

奏請叩謁

大行皇帝梓宮摺子

奏爲瀝陳哀悃額懇

鴻慈俯准微臣叩謁

梓宮瞻覲

天顏恭摺具

奏仰祈

聖鑒事竊臣於湖南省寓驚聞

大行皇帝龍馭上賓捨地哀號五中摧裂欽惟

大行皇帝聖神文武

久道化成三十年如一日普天率土渥被

仁施淪肌浹髓愴茲

大事萬類銜哀

皇上至孝彌綸篤思罔極

宸懷益深悲慟惟當

乾元作覩

臨御萬幾承

宗廟

社稷之仔肩胥天下臣民而託命伏乞

聖躬保衛勉節

哀思薄海蒼生同聲叩禱臣由翰林外用知府仰蒙

大行皇帝特達之知曾不十年游膺疆寄

生成踰量感矢捐糜上年四月臣於兩江總督任內因患

癥結掣痛據實奏蒙

恩允回籍調理復於交篆陳謝一摺欽奉

硃批一俟痊愈卽行來京朕切望之至卿當諒之欽此跪

讀之餘彌深感涕方期醫治稍愈卽速北上何圖

鼎湖長痛愴極終天泣血之誠不能自己惟有籲懇

鴻慈准臣叩謁

梓宮瞻覲

天顏俾臣犬馬餘生力疾稍申哀悃不勝迫切待

命之至伏乞



皇上聖鑒訓示遵行謹

奏 道光三十年正月二十八日具

奏奉

御批知道了著來叩謁欽此

自京回籍恭謝

天恩摺子

奏爲恭報

微臣

自京回籍日期叩謝

天恩仰祈

聖鑒事竊

臣

於道光三十年五月由湖南本籍力疾抵

都欽遵奏奉

諭旨祇謁

宣宗成皇帝梓宮尼首哀號自動可及蒙

皇上召見二次

清問殷垂

臣

謹披瀝直陳自忘愚昧並據實籲申蟻悃

復蒙

慈諭詳詢

臣

母歲數及在籍現患病證跪聆之下感激

涕零

陛辭後仍卽南旋茲於六月二十三日到籍伏念

臣病

原於母病義有難言

聖心本卽

天心仁無不至凡此下情之上達悉由

大造之

宏施

俯鑒烏私曲荷

生成於格外彌殷駑負勉圖報答於方來所有微臣自

京回籍日期理合恭摺具

奏叩謝

天恩伏乞

皇上聖鑒謹

奏  
道光三十年六月二十四日具

奏奉

硃批知道了欽此